

Na osnovu čl. 13. i 14. Zakona o političkim organizacijama (Službeni list BiH, br. 27/91), stranka "Nezavisna građanska lista" na svojoj Osnivačkoj skupštini održanoj u Goraždu dana 22.11.2021. godine, donijela je:

STATUT STRANKE NEZAVISNA GRAĐANSKA LISTA

OPĆE ODREDBE

Član 1. (Predmet Statuta)

- (1) Ovim Statutom utvrđuje se način rada i djelovanja stranke Nezavisna građanska lista (u daljem tekstu: Stranka) i druge odredbe od značaja za rad Stranke.
- (2) Statutom se naročito utvrđuje:
 - 1) Ciljevi političke stranke i način njihovog ostvarivanja;
 - 2) Naziv i sjedište;
 - 3) Unutrasnja organizacija;
 - 4) Uslovi i način za učlanjivanje i prestanak članstva, te prava, obaveze i odgovornosti članova;
 - 5) Organi stranke, njihova prava, obaveze i odgovornosti;
 - 6) Predstavljanje i zastupanje stranke;
 - 7) Način sticanja, korištenja i raspolaganja sredstvima stranke;
 - 8) Način obavještanja javnosti o radu i sticanju sredstava stranke;
 - 9) Način odlučivanja o udruživanju u saveze i druge oblike udruživanja političkih organizacija;
 - 10) Način donošenja Statuta;
 - 11) Način donošenja odluke o prestanku rada stranke;
 - 12) Način raspolaganja imovinom u slučaju prestanka rada stranke;

Član 2. (Status pravnog lica)

Stranka stiče status pravnog lica upisom u sudski registar.

Član 3. (Pečat, grb i zastava)

- (1) Stranka ima svoj pečat, grb i zastavu. Pečat Stranke je okruglog oblika. U njegovom središtu je znak NGL. Puni naziv Nezavisna građanska lista ispisan je u obodnome krugu.
- (2) Pečate mogu imati organi Stranke definisani ovim Statutom.
- (3) Izgled grba i zastave Stranke utvrđuje se odlukom Glavnog odbora Stranke.

I -CILJEVI POLITIČKE STRANKE I NAČIN NJIHOVOG OSTVARIVANJA

Član 4. (Djelovanje stranke)

- (1) Stranka je multinacionalna i multietnička, koja djeluje na osnovu zakona, odredaba ovoga Statuta i Programa, te drugim općim i pojedinačnim aktima, koji se donose u skladu sa zakonima.

Član 5. (Programski ciljevi)

- (1) Stranka ostvaruje svoje ciljeve zakonitim, demokratskim i nenasilnim metodama.
- (2) Programski ciljevi su sljedeći:

- 1) suverenitet Bosne i Hercegovine u njenim postojećim granicama;
- 2) pristup Evropskoj Uniji i Sjeveroatlantskom savezu;
- 3) uvođenje pravne sigurnosti, ažurnosti i nezavisnosti sudstva u borbi protiv korupcije;
- 4) vladavina prava i primjena zakona;
- 5) zaštita ljudskih prava i prava manjina;
- 6) socijalna zaštita ugroženih;
- 7) zaštita i pravo glasa nacionalnih manjina;
- 8) ravnopravnost polova;
- 9) izgradnja efikasnih institucija;
- 10) slobodni i nezavisni mediji;
- 11) izgradnja civilnog društva;
- 12) razvoj obrazovanja;
- 13) ekonomske reforme kroz razvoj privatnog sektora;
- 14) podsticaj razvoju malih i srednjih preduzeća;
- 15) briga o mladima i demobilisanim borcima;
- 16) reforme penzijskog i zdravstvenog osiguranja;
- 17) izgradnja infrastrukture (transport, energija, telekomunikacije, voda);
- 18) zaštita okoliša.

II - NAZIV I SJEDIŠTE STRANKE

Član 6. (Naziv i sjedište)

- (1) Puni naziv stranke je: "Nezavisna građanska lista".
- (2) Sjedište Stranke je u Goraždu, ul. Ibrahima Čelika 20A.

III -UNUTRASNJA ORGANIZACIJA

Član 7. (Teritorijalni princip)

- (1) Stranka je organizirana na teritorijalnom principu.
- (2) Teritorijalna organizacija stranke ustrojena je na teritorijalnim principima BiH i organizirana je po kantonima, regijama, gradovima i općinama.
- (3) Teritorijalne organizacije djeluju samostalno u skladu sa Statutom i programom stranke i odlukama viših organa Stranke.
- (4) Organi teritorijalnih organizacija ostvaruju međusobnu saradnju i djeluju zajedničkim nastupima na izborima.

IV -USLOVI I NAČIN ZA UČLANJIVANJE I PRESTANAK ČLANSTVA, TE PRAVA, OBAVEZE I ODGOVORNOSTI ČLANOVA

Član 8. (Članstvo)

- (1) Članstvo u stranci moguće je pod jednakim uslovima svakom punoljetnom državljaninu Bosne i Hercegovine, koji prihvata Statut i program stranke.
- (2) Organ gradske/općinske organizacije, na osnovu popunjene pristupnice za učlanjenje donosi odluku o prijemu u članstvo.
- (3) Članom stranke postaje se trenutkom upisa u glavni registar članstva stranke, koji se vrši na osnovu dostavljene pristupnice.
- (4) Članu se izdaje članska karta.

Član 9. (Počasno članstvo)

- (1) Članstvo u stranci može biti redovno i počasno.
- (2) Odluku o primanju osobe u počasno članstvo stranke donosi Predsjednik stranke ili Glavni odbor.
- (3) Počasnim članom može postati osoba koja u svom političkom ili društvenom djelovanju podržava ideje za koje se zalaže stranka i koja je svojim javnim istupima i neposrednim djelovanjem promovisala i podržavala stranku u zemlji i inostranstvu.
- (4) Počasnim članom može postati i osoba koja je strani državljanin.

Član 10. (Prestanak članstva)

Članstvo u Stranci prestaje:

- 1) istupanjem iz članstva;
- 2) isključenjem iz stranke;
- 3) smrću.

Član 11.
(Isključenje iz stranke)

Iz stranke se isključuje član koji:

- 1) ne poštuje Statut i program stranke, kao i druge opće i pojedinačne akte stranke,
- 2) ne poštuje odluke koje donose nadležni organi stranke u okviru svoje nadležnosti;
- 3) ponašanjem, djelovanjem ili postupanjem nanosi veću štetu interesima ili ugledu pojedinog tijela stranke ili stranke u cjelini;
- 4) u javnosti iznosi političke stavove koji su u suprotnosti sa Statutom i programom stranke, te odlukama nadležnih organa stranke u okviru svoje nadležnosti;

Član 12.
(Prava i obaveze člana)

(1) Član stranke ima sljedeća prava i obaveze:

- 1) sudjelovati u oblikovanju i ostvarivanju politike stranke;
- 2) aktivno sudjelovati u radu organa i tijela stranke u kojoj je izabran, odnosno imenovan;
- 3) poštivati Statut i programska načela stranke, te provoditi odluke nadležnih stranačkih organa;
- 4) redovno plaćati članarinu u skladu sa posebnim pravilnikom;
- 5) birati i biti biran u sve stranačke organe i tijela;
- 6) istaknuti kandidaturu i natjecati se u postupku izbora kandidata na stranačkim listama za izbore u predstavničkim i izvršnim tijelima na svim nivoima državnog organizovanja u Bosni i Hercegovini;
- 7) biti obaviješten o stranačkim aktivnostima, stavovima i odlukama, te dobiti druge odgovarajuće informacije putem stranačkih glasila;
- 8) na sastancima, odnosno sjednicama stranačkih organa i tijela javno i argumentirano iznositi prijedloge, mišljenja i kritike vezane uz rad stranke, stranačkih organa i tijela;

Član 13.
(Odgovornost članova)

Član Stranke odgovoran je za zakonito i blagovremeno izvršavanje svih postavljenih zadataka od strane nadređenih organa Stranke.

V -ORGANI STRANKE

Član 14.
(Organi stranke)

Organi Stranke su:

- 1) Predsjednik;
- 2) Glavni odbor;
- 3) Kantonalni / regionalni odbor
- 4) Gradski / općinski odbor

Član 15.

(Predsjednik)

- (1) Predsjednik Stranke je najviši politički organ Stranke.
- (2) Predsjednik stranke zastupa i predstavlja stranku, rukovodi aktivnostima na provođenju politika i programa stranke, te odlučuje o tekućim poslovima vezanim za neposredno upravljanje strankom.

Član 16.

(Nadležnosti Predsjednika)

- (1) Predsjednik stranke nadležan je za sljedeće:

- 1) provodi politiku stranke u skladu sa zakonom, Statutom, programskim ciljevima, odlukama i zaključcima Glavnog odbora stranke, te donosi sopstvene izvršne političke odluke, zaključke, upute i druge akte;
- 2) brine se i osigurava međusobnu saradnju svih organa stranke;
- 3) odgovara za finansijsko poslovanje stranke u skladu sa zakonima;
- 4) po svojoj funkciji obavlja dužnost predsjednika Glavnog odbora, saziva glavni odbor stranke i predsjedava njegovim radom;
- 5) donosi odluke o raspuštanju organa stranke, smjenu članova organa Stranke te imenovanje Povjereništva stranke za slučaj vanrednih okolnosti;
- 6) ima pravo „Veta“ na sve akte koje donose bilo koji organ Stranke;
- 7) donosi odluke o kooptiranju pojedinačnih članova u sve organe Stranke;
- 8) obavlja druge poslove u skladu sa statutom.

Član 17.

(Izbor predsjednika i mandat)

- (1) Prvi Predsjednik stranke se bira na osnivačkoj skupštini, a po isteku mandata bira ga Glavni odbor.
- (2) Mandat predsjednika stranke traje 4 godine uz mogućnost ponovnog izbora.

Član 18.

Glavni odbor

- (1) Glavni odbor (u daljem tekstu: GO) je organ Stranke koji se formira za državni i entitetski nivo teritorijalne organizacije Stranke.
- (2) Glavni odbor broji 7 (sedam) članova i to:
 - 1) predsjednik Stranke koji je ujedno i predsjednik GO,
 - 2) 2 (dva) podpredsjednika,
 - 3) 4 (četiri) člana koje imenuje Predsjednik.

Član 19.
(Konstituisanje GO)

- (1) Glavni odbor stranke se konstituiše imenovanjem članova od strane Predsjednika Stranke.
- (2) Konstituirajuću sjednicu novoizabranog Glavnog odbora saziva predsjednik stranke.

Član 20.
(Nadležnosti GO)

Nadležnosti Glavnog odbora stranke:

- 1) donosi Statut, njegove izmjene i dopune, odluke i zaključke, interna akta Stranke, te daje preporuke i smjernice nižim organima stranke;
- 2) donosi Program rada Stranke,
- 3) razmatra i predlaže načine povezivanja i saradnje stranke s drugim političkim ili nepolitičkim organizacijama,
- 4) raspravlja o koalicijama stranke;
- 5) donosi odluku o načinu kandidiranja i izboru kandidata za izbor članova Predsjedništva BiH, poslanika u predstavničke organe Bosne i Hercegovine, Federacije Bosne i Hercegovine i Republike Srpske;
- 6) zauzima politička stajališta o pitanjima iz djelokruga zastupničkih i izvršnih organa BiH, Federacije Bosne i Hercegovine i Republike Srpske,
- 7) donosi finansijski plan i usvaja završni finansijski izvještaj stranke za prethodnu godinu;
- 8) analizira i ocjenjuje vođenje predizborne kampanje, stranačke aktivnosti u kampanji i rezultate izbora na svim nivoima.

Član 21.
(Rad GO)

- (1) Glavni odbor radi u sjednicama. Sjednica ima kvorum ako joj prisustvuje nadpolovična većina imenovanih članova.
- (2) Predsjednik Stranke koji je ujedno i predsjednik GO saziva sjednice i njima rukovodi.
- (3) GO donosi sve odluke nadpolovičnom većinom od ukupnog broja članova GO.

Član 22.
(Kantonalni i regionalni odbori stranke)

- (1) Kantonalni odbori (u daljem tekstu: KO) i Regionalni odbori (RO) sastoje se od predsjednika i 4 (četiri) člana.
- (2) Predsjednik Stranke donosi Odluku o imenovanju predsjednika KO/RO, a novoimenovani predsjednik KO/RO vrši imenovanje još 4 člana odbora.

Član 23.
(nadležnosti KO/RO)

KO/RO nadležni su za sprovođenje programskih ciljeva Stranke na teritoriji za koju su osnovani, vođenje kampanje, predlaganje kandidatskih listi za izbore na kantonalnom/regionalnom nivou i druga pitanja u skladu sa zakonom, Statutom, Odlukama GO i Predsjednika Stranke.

Član 24.
Način rada KO/RO)

Principi rada i odlučivanja koji se odnose na rad GO, analogno se primjenjuju i na rad KO/RO.

Član 25.
(Gradski/općinski odbori)

- (1) Gradski/općinski odbori formiraju se za područje gradova i općina u BiH.
- (2) Gradski/općinski odbor sastoji se od predsjednika i 4 (četiri) člana.
- (3) Predsjednika odbora imenuje Predsjednik Stranke na prijedlog predsjednika KO/RO.

Član 26.
(Nadležnosti G/OO)

Gradski/općinski odbori nadležni su za sprovođenje programskih ciljeva Stranke na teritoriji za koju su osnovani, vođenje kampanje, predlaganje kandidatskih listi za izbore na lokalnom nivou i druga pitanja u skladu sa zakonom, Statutom i Odlukama GO, KO/RO i Predsjednika Stranke.

Član 27.
Način rada G/OO)

Principi rada i odlučivanja koji se odnose na rad GO, analogno se primjenjuju i na rad Gradskih/Općinskih odbora.

Član 28.
(Povjereništvo)

- (1) Izuzetno od odredbi člana 14. Statuta, Predsjednik Stranke može svojom posebnom Odlukom formirati Povjereništvo, kao poseban *ad hoc* organ koji se ustanovljuje u vanrednim okolnostima.
- (2) U vanrednim okolnostima Predsjednik Stranke može da raspusti bilo koji organ i uvede Povjereništvo.
- (3) Vanredne okolnosti su one okolnosti kada regularni organ Stranke, na bilo kojem nivou, ne može raditi nesmetano, o čemu odluku donosi Predsjednik Stranke.
- (4) Odlukom o uvođenju Povjereništva definiše se organ koji se raspušta, imena i broj članova Povjereništva i ovlaštenja.

V – 1 Generalni sekretar i Sekretarijat

Član 29. (Generalni sekretar)

- (1) Generalni sekretar je stručno-operativno lice i rukovodilac je Sekretarijata stranke.
- (2) Generalni sekretar odgovoran je za sljedeće:
 - 1) organizuje i koordinira rad organa i tijela stranke;
 - 2) brine se o zakonitom radu Stranke;
 - 3) organizuje izvršenje odluka predsjednika i Glavnog odbora,
 - 4) učestvuje u pripremi i radu organa stranke, te priprema i osigurava organizacione, materijalne i tehničke uslove za njihov rad;
 - 5) organizuje i koordinira poslovanje stranke, naročito materijalno-finansijsko
 - 6) obavlja i druge poslove u skladu sa Statutom i odlukama viših organa stranke.

Član 30. (Sekretarijat)

- (1) Za potrebe obavljanja stručnih, operativnih i administrativnih i tehničkih poslova stranke, Generalni sekretar osniva sekretarijat stranke.
- (2) Generalni sekretar donosi pravilnik o organizaciji sekretarijata stranke, kojim se uređuje njegov rad, utvrđuje broj administrativnih i drugih stručnih radnika potrebnih za njegov nesmetani rad, iznos plaće i drugih naknada.

VI – PREDSTAVLJANJE I ZASTUPANJE

Član 31. (Ovlašteno lice)

- (1) Stranku javnom životu i u pravnom prometu, predstavlja i zastupa Predsjednik stranke.
- (2) Predsjednik Stranke može svojom odlukom ovlastiti da Stranku predstavlja i zastupa predsjednik drugog organa, za teritorijalno područje na kojem taj organ djeluje.

VII - NAČIN STICANJA, KORIŠTENJA I RASPOLAGANJA SREDSTVIMA STRANKE

Član 32. (Imovina stranke)

- (1) Stranka može posjedovati pokretnu i nepokretnu imovinu.
- (2) Odluku o kupovini imovine iz stava (1) donosi predsjednik stranke.
- (3) Izuzetno, Odluku o kupovini sitnog inventara, uredske opreme, kancelarijskog materijala sl.u vrijednosti do 500 KM (petstotinaKM), donosi organ stranke za čiji se račun oprema kupuje.
- (4) Odluku o nabavci uredskog materijala za nesmetano funkcionisanje sekretarijata stranke, donosi generalni sekretar stranke.

Član 33.
(Finansiranje stranke)

- (1) Stranka se finansira prihodima od:
- 1) članarine;
 - 2) dotacija iz budžeta;
 - 3) donacija;
 - 4) drugih izvora u skladu sa zakonom.

Član 34.
(Korištenje sredstava)

Novčana sredstva Stranka koristi za finansiranje političke kampanje, nabavku pokretne i nepokretne imovine, inventara, kancelarijskog materijala i sl.

Član 35.
(Raspolaganje sredstvima)

Sredstvima stranke slobodno raspolazu organi kojima su sredstva uplacena ili dodijeljena.

VIII - NAČIN OBAVJEŠTAVNJA JAVNOSTI O RADU STRANKE

Član 36.
(Obavještavanje javnosti o radu)

- (1) Rad organa i tijela stranke je javan, a javnost rada ostvaruje se na javnim skupovima, tribinama, okruglim stolovima, izvještavanjem javnosti i članstva putem saopštenja, izjava, reagiranja, konferencija za medije, prisustvom predstavnika javnog informisanja na skupovima stranke, te na druge prikladne načine.
- (2) Izuzetno, organi stranke mogu raspravljati i odlučivati bez obavještavanja javnosti, i to u slučajevima kada se raspravlja o:
 - 1) unutrašnjim kadrovskim pitanjima;
 - 2) strategiji i taktici izborne kampanje i nominiranju kandidata za izbore;
 - 3) spajanju, odnosno udruživanju s drugim političkim organizacijama;
 - 4) poslovanju stranke;

Član 37.
(Izdavačka djelatnost i stranačka glasila)

- (1) Stranka u cilju ostvarivanja javnosti svog rada, može imati vlastitu izdavačku djelatnost i stranačko glasilo, koje može biti štampano i elektronsko.
- (2) Stranka može osnivati ili se koristiti ostalim sredstvima javne komunikacije (internet, televizija, radio i sl.) u skladu sa zakonom i Statutom.
- (3) Glavni odbor stranke donosi odluku o formiranju i načinu rada glasila Stranke.

IX - NAČIN ODLUČIVANJA O UDRUŽIVANJU U SAVEZE I DRUGE OBLIKE UDRUŽIVANJA POLITIČKIH ORGANIZACIJA

Član 38. (Udruživanje i odlučivanje)

- (1) Stranka se može spojiti s drugim političkim organizacijama u BiH i inostranstvu radi ostvarivanja svojih političkih ciljeva.
- (2) Stranka se može učlaniti u domaće i međunarodne političke asocijacije.
- (3) Odluku o udruživanju donosi Glavni odbor.

X - NAČIN DONOŠENJA STATUTA

Član 39. (Donošenje Statuta)

- (1) Statut donosi Skupština osnivača.
- (2) Nakon Skupštine osnivača, nadležnost za izmjene i dopune, kao i donošenje novog Statuta prelazi u nadležnost Glavnog odbora.
- (3) Prijedloge za izmjene i dopune Statuta mogu inicirati svi organi Stranke.

XI - NAČIN DONOŠENJA ODLUKE O PRESTANKU RADA STRANKE

Član 40. (Prestanak rada)

- (1) Stranka prestaje s radom u skladu sa zakonom.
- (2) Odluku o prestanku rada stranke donosi Glavni odbor stranke.
- (3) Odluka o prestanku rada stranke obavezno sadrži odredbu o načinu raspolaganja imovinom stranke.

XII - NAČIN RASPOLAGANJA IMOVINOM U SLUČAJU PRESTANKA RADA STRANKE

Član 41. (Raspolaganje imovinom)

U slučaju prestanka rada Stranke, imovinom raspolaže predsjednik Stranke i donosi odluku o njenoj raspodjeli.

XIII - PRELAZNE I ZAVRŠNE ODREDBE

Član 42. (Stupanje na snagu i primjena)

Ovaj Statut stupa na snagu danom donošenja na Skupštini osnivača, a primjenjivaće se od dana upisa u Registar kod nadležnog suda.

Goražde, 22.11.2021.g.

Predsjedavajući skupštine

Bojan Krunić
